

Inatsisissatut siunnersuummut nassuiaatit

Nassuiaatit nalinginnaasut

1. Aallaqqaasiut:

Naalackersuisut siulittaasuata nalunaarutigaa Inatsisartunut qinersisoqassasoq, ullorlu qinersivissaq 2. juni 2009-imut aalajangiullugu.

UPA 2005/25-mi "Inatsisartut Naalackersuisullu pillugit Inatsisartut inatsisissaattut siunnersuut"-mik suliarinninnermi suleqatigiissitamit nassuiaat" Inatsisartut oqaluuseraat. Nassuiaammi Inatsisartunut qinersisitsisoqartarnissaa pillugu apeqqut ilaatigut pineqarpoq. Nassuiaatip Inatsisartuni oqaluuserineqarnerani suleqatigiissitap nassuiaasersuinerit inernerillu angusai pillugit nalornissuteqartoqarneranik saqqummersoqanngilaq.

Suleqatigiissitap nassuiaataani atuarneqarsinnaavoq, Inatsisartut Naalackersuisullu pillugit inatsisip pisuni naalackersuisut ataasiakkaat, Inatsisartut tamarmiusut imaluunniit naalackersuisut siulittaasuata ilaasortaajunnaarsinneqarneranni Inatsisartunut qinersisoqarnissaanik erseqqissumik aalajangersaanissamut periarfissiinnginnera, Naalackersuisulli siulittaasuata peqqutaasuni allani kissaatigippagu Inatsisartunut qinersisitsissasoq, tamanna piffissap qinigaaffiup naannginnerani pissagaluarpat.

Inatsisartunut qinersisarneq pillugu Inatsisartut inatsisaata aalajangersaavigaa, Inatsisartunut ilaasortat ukiunut sisamanut qinigaasarnissaat. Kingullermik 15. november 2005-mi qinersisoqarpoq. Taamaalilluni 2. juni 2009-imi qinersisoqarneratigut inatsisitigut qinigaaffissap piffissartaa nalinginnaasumik ukiut sisamaasussaq qaammatinik tallimanik sivikillineqassaaq. Taamatut nikingasoortitsineq inatsisitigut tunngavissaqartinneqartariaqarpoq, tamannalu qinersisarneq pillugu inatsimmiinngitsoq imaluunniit Inatsisartut Naalackersuisullu pillugit inatsimmiinngitsoq nalilerneqarpoq.

Taamaalilluni inatsisissatut siunnersuutip 2. juni 2009-imi Inatsisartunut qinersisitsinissap inatsisitigut tunngaviata nalornisoorutigineqarsinnaannginnera qularnaarpaa.

2. Pisortanut aningaasaqarnikkut allaffissornikkullu sunniutaasussat:

Inatsit naapertorlugi kingusinnerpaamik 2009-imi Inatsisartunut qinersisoqartussaagaluarpoq. Qinersinerup siuartinneqarnera aningaasaqarnermut

allaffissornikkullu sunniuteqassanngilaq maannamut naatsorsuutaareersutut iinnassaaq.

Qinersisarneq pillugu inatsimmi maleruagassat naapertorlugit inatsisartunut qinersinissap piareersarneqarnissaanut ingerlanneqarnissaanullu allaffissornikkut nukissanik atuinnermut atuinissamillu kommunit nalinginnaasumik aningaasartuuteqassapput.

Inatsisartunut qinersisoqarnerani nalinginnaasumik annertussusilinnik Nunatta karsia qinersinermi atortunut allanullu allaffissornikkut nukissanik atuissaaq, tassunga ilaalluni Valgnevni allattoqartinneqarnera.

2009-mut aningaasanut inatsimmi konto pingaarnermi 10.06.10-mi Partiit qineqqusaarnissannut tapiissutit 3.5 mio. kruunit miss. aningaasaliissutissatut immikkoortinneqarsimapput qinersinermut atatillugu naalakkersuinikkut sulinnermut peqataatitaqarnissamut tapiissutit. Konto pingaarnermi 10.11.10 qinersinermut aningaasartuutitut 450.000 kruunit immikkoortinneqarput Namminersorerullutik Oqartussani qinersinermut aningaasartuutitut.

3. Inuussutissarsiuteqartunut aningaasaqarnermut allaffissornikkullu sunniutissat:

2009-mi qinersisoqarnissaani toqqaannartumik aningaasatigut allaffissornermut inuussutissarsiuteqartunullu sunniuteqarnerlunnerunissaa ilimagineqanngilaq 2009-mi kingusinnerusukkut qinersisoqarnissaaninngarnit.

4. Avatangiisunut pinngortitamullu sunniutissat:

Siunnersuutip avatangiisunut pinngortitamullu sunniuteqarnissaa ilimagineqanngilaq.

5. Innuttaasunut allaffissornermut sunniutissat:

Siunnersuutip innuttaasunut allaffissornikkut sunniuteqarnissaa ilimagineqanngilaq.

6. Naalagaaffeqatigiinnermut namminersornermullu pissutsit:

Siunnersuut naalagaaffeqatigiinnermut namminersornermullu sunniuteqarnissaa siunniunneqanngilaq.

7. Oqartussaasut soqutigisaqatigiillu tusarniaavigineqarnerat:

Siunnersuut tusarniaassutigineqanngilaq, siunnersuummi taamaallaat inatsisartunut qinersisoqarnissaanut aalajangersaanermik tunngassuteqarmat, takuuk nalinginnaasumik nassuiaammi aallaqqaasiut.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Naalackersuisut siulittaasuata aalajangiiffigaa, 2. juni 2009-imi inatsisartunut qinersisoqassasoq. Taamatuttaaq nalinginnaasumik nassuiaammi aallaqqaasiut innersuussutigineqarpoq.

Ulluliussap aalajangersaavigineqarnerani pingaartumik qinersinissap piareersarneqarneranut atatillugu eqquutsinneqartussani qinersisarneq pillugu inatsimmi killissarititaasut sianiginiarneqarsimapput. Assersuutigalugu qinersisarneq pillugu inatsimmi aalajangersarneqarpoq, partiit nutaat qinersinissamut qineqqusaarnissamik kissaateqartut qinersinissap pilinnginnerani sapaatit akunneri tallimat nallertinnagit Valgnevnimut nalunaarutigineqarnissaat. Tamatumunngalu naliliinissamut ilanngunneqarpoq inatsisartunut qinersinissap piareersarneqarnera pillugu suliasanut tunngassuteqartut.

§ 2-mut

Siunnersuutip kingunerissavaa, qinigaasarnerup piffissartaa ukiunut sisamanut aalajangersagaasoq, maanna qinersinissaq pineqartoq eqqarsaatigalugu nikingassammat. Taamatuttaaq nalinginnaasumik nassuiaammi aallaqqaasiut innersuussutigineqarpoq.

§ 3-mut

Siunnersuutigineqarpoq inatsisartut inatsisissaata 17. april 2009-imi atuutilernissaa. Inatsisip 17. april 2009-imi atuutilernissaaniit qinersinissamut aningaasartuutit matussuserneqarnissaat inatsimmi tunngavissaqartinneqarpoq.